

Opitz, Martin: Auff die Melodey: Kehr vmb mein Seel/ rc (1624)

- 1 Jetzt blicken auß des Himmels Saal
- 2 Die güldne Sternen allzumahl/
- 3 Ich bin ohn Hoffnung gantz allein/
- 4 Ich wach/ vnd andre schlaffen ein.
- 5 Ihr Jungfraw/ lieget in der Ruh/
- 6 Vnd habet ewer äuglein zu/
- 7 Ihr blaset auß dem rothen Mundt
- 8 Das süsse Gifft/ so mich verwundt.
- 9 Ihr dencket nicht an meine Noth/
- 10 Noch an den starcken Liebes-Gott/
- 11 Der mein betrübt Gemüth gebracht
- 12 In ewer Hand vnd grosse Macht.
- 13 Ich lieg an ewrer tauben Thier/
- 14 Ob ich doch möchte kommen für/
- 15 Vnd ewren vnbewegten Sinn
- 16 Durch meine Bitte legen hin.
- 17 Die Vögel so sonst fliegen ferr/
- 18 Die Fisch auch in dem wilden Meer
- 19 Sindt sicher/ geben sich zu ruh/
- 20 Vnd nur ich thue kein Auge zu.
- 21 Die Thränen ruff ich Zeugen an/
- 22 Damit ich euch nicht zwingen kan/
- 23 Die Thränen so ich euch zu schandt
- 24 Verlaß/ als meiner Liebe Pfandt.
- 25 Ein jeglich ding hat seine Zeit/
- 26 Wann es gefroren vnd geschneit/
- 27 Macht sich der Westwindt auff die Bahn/
- 28 Vnd legt der Erdt new Kleider an.
- 29 Das eine fellt/ das ander steht/
- 30 Wann Ph
- 31 Tritt ab der Mond/ kompt er heran/
- 32 Muß Ph
- 33 Es hatt doch alles sein gebür/

34 Zwey dinge bleiben für vnd für/
35 Ewr harter Sinn/ vnd meine Pein/
36 Die müssen gantz vnendtlich sein.
37 Die vrsach ist mein standthafft Hertz/
38 Weil ich nicht mit der Liebe schertz/
39 Noch/ wie die Blumen/ mich verkehr/
40 So Boreas weht hin vnd her.
41 Ich bin kein Schifflein in der See/
42 Das nach des Windes Wellen geh/
43 Ich halt allein bey euch fest an/
44 Bey euch bleib ich/ sonst niergendt/ stahn.
45 Vnd diß ist/ Jungfraw/ meine schuldt/
46 Wohlan ich geh/ daß jhr nicht solt
47 Euch vber mich beschweren sehr/
48 Ich will euch nicht bekümmern mehr.
49 Gehabt euch wol/ ich scheid jetzt ab/
50 Gehabt euch wol/ ich eil ins Grab/
51 Ach lasset doch mein Seelelein
52 In ewren Schoß verwahret sein/
53 Sonst wirdt sie Venus auff dem Wagen/
54 So hoch als Sonn vnd Monde tragen/
55 Sonst wirdt mein arme Seele stehn/
56 Wo jetzundt die Gestirn auffgehn.
57 Die Sternen in deß Himmels Feld/
58 So nächtlich leuchten aller Welt/
59 Die waren Buhler vor der Zeit/
60 Jetzt stehen sie von Noth befreyt.
61 Sie stehn vnd haben fleissig acht/
62 Was Pein vnd Leiden jhr mir macht/
63 Sie zeigens an der Venus Sohn/
64 Der euch wirdt geben rechten Lohn.
65 Der Liebe Schwestern/ Leyd vnd Frewd/
66 Sein auch alldar/ vnd samlen beyd
67 In einen Krug die Thränen all/
68 Vnd setzen sie auff Venus Saal.

69 Die Namen Venus zeichnen lest
70 In jhr Register/ wer das best
71 Vnd meiste dann gelitten hier/
72 Wirdt andern dort gezogen für.
73 Die beste Stell bleibt wol für mich/
74 Weil ich jetzt sterbe williglich/
75 Da will ich stehen euch zu Spott/
76 Die jhr mich bringet zu dem Todt.
77 Jungfraw ich geh/ vnd laß allhier
78 Die heissen Thränen vor der Thür/
79 Doch/ soll ich fort/ denckt doch vorhin/
80 Ob ich vmb euch den Todt verdien?

(Textopus: Auff die Melodey: Kehr vmb mein Seel/ rc. Abgerufen am 23.01.2026 von <https://www.textopus.de/poems/1>)